


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-50	Qaf	45	3	Makkiyyah	Ke-34	8





### **Zaman Diturunkan**

Surah Qaf adalah satu Surah Makkiyyah, ia mungkin sekali diturunkan selepas perintah berda'wah secara terbuka di akhir tahun ke-5 Kenabian selepas berlaku hijrah ke Habsyah. Zaman itu dipanggil zaman تذكير iaitu zaman mengingatkan dan memaklumkan kepada masyarakat tentang pokok-pokok ajaran agama Islam, ketika itu belum lagi berlaku penganiayaan dan kezaliman terhadap orang-orang Islam, walau bagaimanapun suara-suara mendustakan Rasulullah s.a.w. sudah mula kedengaran. Surah ini dilihat dari segi kandungan dan gaya bahasanya menyerupai Surah al-Mulk.

### **Kelebihan Surah Qaf**

1. Rasulullah s.a.w. selalu membacanya dalam sembahyang 2 Hari Raya, sembahyang Juma'at dan juga sembahyang Maghrib. Sayyidina `Umar pernah bertanya Abu Waqid al-Laitsi tentang surah-surah apakah yang selalu Rasulullah s.a.w. baca dalam sembahyang 2 Hari Raya, jawab Abu Waqid al-Laitsi: كَانَ يَقْرَأَ فِيهِمَا بَقَ وَالْقُرْآنَ الْمَجِيدَ وَاقْتَرَبَتِ السَّاعَةُ وَانْشَقَّ الْقَمَرُ Bermaksud: "Nabi s.a.w. selalu membaca di dalam sembahyang 2 hari raya Surah Qaf dan Surah al-Qamar". Hadits riwayat Shahih Muslim, Kitab Sembahyang 2 Hari Raya, Hadits 2,096.
2. Rasulullah s.a.w. juga selalu membaca Surah Qaf dalam sembahyang Subuh supaya ia diingati (dihafal) oleh para sahabat dan dihayati pula kandungannya. Qutbah bin Malik meriwayatkan bahawa beliau telah mendengar Rasulullah s.a.w. membaca Surah Qaf di dalam sembahyang Subuh سَمِعَ النَّبِيَّ صَلَّى اللَّهُ عَلَيْهِ وَسَلَّمَ يَقْرَأُ فِي الْفَجْرِ وَالنَّحْلَ بِاسِقَاتٍ لَهَا طَلْعٌ نَضِيدٌ Sahih Muslim, Kitab Shalat, Bab Bacaan dalam sembahyang Subuh, hadits 1,053.
3. Jabir bin `Abdillah meriwayatkan bahawa Rasulullah s.a.w. juga membaca Surah Qaf di dalam sembahyang Maghrib dan surah-surah lain seumpamanya كَانَ يَقْرَأُ فِي الْفَجْرِ بَقَ وَالْقُرْآنَ وَنَحْوَهَا Sahih Muslim, Kitab Shalat, Bab Bacaan pada sembahyang Subuh, hadits 1,056.

### **Perkaitan Surah Qaf Dengan Surah Sebelum Dan Selepasnya**

1. 3 Surah sebelum ini adalah surah-surah Madaniyyah iaitu Surah Muhammad, Surah al-Fath dan Surah al-Hujuraat, 7 surah bermula dari Surah Qaf dan surah-surah seterusnya adalah Surah Makkiyyah. Tema utama surah-surah itu ialah hal ehwal akhirat dan dalil-dalil yang membuktikan kebenaran wujudnya hari akhirat.
2. Perintah jihad yang terdapat di dalam Surah Muhammad, berita gembira tentang kemenangan orang-orang Islam yang terdapat di dalam Surah al-Fath dan hak-hak yang tersebut di dalam Surah al-Hujuraat semuanya disyaratkan dengan adanya kepercayaan kepada hari akhirat yang tersebut di dalam Surah Qaf dan surah-surah selepasnya.



3. Di dalam Surah az-Dzariyaat selepas ini dikemukakan dalil-dalil تاريخي, نقلي, عقلي, سمائي, أرضي, أفاقي untuk membuktikan kebenaran adanya hari akhirat. dan أنفسي

### Hizib Terakhir

Dari Surah Qaf bermulalah hizib ke-7 al-Qur'an, ia merupakan hizib terakhir di dalam al-Qur'an.

### **Beberapa Kata Kunci Dan Tema Utama Surah**

Surah Qaf adalah satu surah yang menarik dan sangat kuat kesannya dilihat dari sudut perkataan-perkataan yang digunakan, rima-rimanya dan gaya bahasanya serta erti-ertinya yang begitu mendalam. Di dalam surah ini dikemukakan dalil-dalil عقلي bagi kewujudan akhirat untuk menyedarkan قلبٌ مُنِيبٌ yang akan mendorong manusia menjadi عَبْدٌ مُنِيبٌ.

1. Di dalam surah ini dikemukakan beberapa kritikan dan bantahan orang-orang musyrikin Mekah terhadap al-Qur'an.

(a) Kenapa Qur'an ini diturunkan kepada seorang Muhammad saja daripada sekian ramai orang-orang Quraisy (Ayat: 2).

أَنْ جَاءَهُمْ مُنْذِرٌ مِنْهُمْ

(b) Seruan al-Qur'an tentang akhirat tidak masuk aqal kita (Ayat: 3).

ذَلِكَ رَجْعٌ بَعِيدٌ

2. Di dalam surah ini disebutkan sifat-sifat pemimpin-pemimpin musyrikin Mekah.

(a) Sangat tidak bersyukur كَفَّارٍ (Ayat: 24).

(b) Sangat degil dan keras kepala terhadap kebenaran عَنِيدٍ (Ayat: 24).

(c) Sangat suka mencegah orang daripada kebaikan مَنَّاعٍ لِلْخَيْرِ (Ayat: 25).

(d) Melampaui batas مُعْتَدٍ (Ayat: 25).

(e) Berada dalam keraguan مُرِيبٍ (Ayat: 25).

(f) Musyrik الَّذِي جَعَلَ مَعَ اللَّهِ إِلَهًا آخَرَ (Ayat: 26).

3. Sebagai perbandingan, dikemukakan pula sifat-sifat Rasulullah.

(a) Beliau adalah مُنْذِرٍ (pemberi amaran dan ancaman) (Ayat: 2).

(b) مُذَكِّرٍ (pemberi nasihat) (Ayat: 45).

(c) Tidak memaksa dalam penyampaian agama جَبَّارٍ (Ayat: 45).

4. Di dalamnya juga tersebut kelebihan-kelebihan dan keutamaan-keutamaan Rasulullah serta para sahabatnya. Antara lainnya ialah:

(a) مُنْقِبِينَ (orang-orang yang bertaqwa) (Ayat: 31).



- (b) أَوَّاب (orang yang suka merujuk kepada Allah) (Ayat: 32).
- (c) حَفِيط (sangat menjaga hak-hak dan tanggungjawab) (Ayat 32).
- (d) Takut kepada Allah walaupun tidak melihatNya (Ayat: 33).
- (e) Mempunyai قلب مُنِيب (hati yang menghadap Allah) (Ayat: 33).
- (f) Penyabar, suka memuji Allah dan bertasbih kepadanya (Ayat: 40).
- (g) Mengingatkan orang ramai dan menasihati mereka dengan al-Qur'an ketika berda'wah dan menyampaikan agama (Ayat: 45).

5. Di dalam surah ini, kepentingan dan keistimewaan قلب مُنِيب ditonjolkan.

(Ayat: 8).

تَبَصَّرَةٌ وَذِكْرَىٰ لِكُلِّ عَبْدٍ مُّنِيبٍ ۝

(Ayat: 33).

مَنْ حَثِي الرِّحْمَنَ بِالْغَيْبِ وَجَاءَ بِقَلْبٍ مُّنِيبٍ ۝

(Ayat: 37).

إِنَّ فِي ذَٰلِكَ لَذِكْرَىٰ لِمَنْ كَانَ لَهُ قَلْبٌ أَوْ أَلْقَى السَّمْعَ وَهُوَ شَهِيدٌ ۝

6. 4 dalil membuktikan kebenaran akhirat dikemukakan di dalam surah ini.

- (a) Selepas manusia dikebumikan, Allah mengetahui dengan sempurna segala perubahan yang berlaku kepada mayat manusia dan ke mana perginya juga diketahui Allah (Ayat: 4).

قَدْ عَلِمْنَا مَا تَنْقُصُ الْأَرْضُ مِنْهُمْ وَعِنْدَنَا كِتَابٌ حَفِيطٌ ۝

Di dalam ayat ini, sifat qudrat dan sifat ilmu Allah yang sempurna dijadikan dalil untuk membuktikan kewujudan hari akhirat.

- (b) Kewujudan hari akhirat dibuktikan dengan satu dalil aqli bahawa tuhan yang telah mencipta buat kali pertama, kenapa tidak mungkin menciptanya buat kali kedua? (Ayat: 15).

أَفَعَيَّنَا بِالْخَلْقِ الْأَوَّلِ بَلْ هُمْ فِي لَبْسٍ مِّنْ خَلْقٍ جَدِيدٍ ۝

- (c) Satu dalil آفاقي juga dikemukakan untuk membuktikan dalil akhirat. Dengan hujan, tanah yang mati menjadi hidup dan subur, begitulah manusia yang telah mati berkuasa dihidupkan oleh Allah semula (Ayat: 11).

وَأَحْيَيْنَا بِهِم بَلَدَةً مَّيْتَةً كَذَٰلِكَ أَخْرَجُ ۝

7. Sejarah kebinasaan bangsa-bangsa dijadikan sebagai dalil bagi adanya pembalasan dan hukuman di



akhirat, ia merupakan dalil-dalil تاريخي.

(a) Sejarah menjadi saksi bahawa 8 kaum sebelum Quraisy juga seperti kaum Quraisy, telah mendustakan nabi masing-masing, kerana itu azab Allah sepatutnya boleh menimpa semua mereka (Ayat: 12-14).

كَذَّبَتْ قَبْلَهُمْ قَوْمُ نُوحٍ وَأَصْحَابُ الرَّيِّسِ وَنَمُودُ ۚ وَعَادٌ وَفِرْعَوْنُ وَإِخْوَانُ لُوطَ ۚ وَأَصْحَابُ الْأَيْكَةِ وَقَوْمُ تُيُوعَ ۚ كُلٌّ كَذَّبَ الرُّسُلَ فَحَقَّ وَعِيدِ ۝

(b) Sejarah menyaksikan bahawa bangsa-bangsa yang lebih kuat lagi daripada Quraisy juga telah dibinasakan (Ayat: 36).

وَكَمْ أَهْلَكْنَا قَبْلَهُمْ مِنْ قَرْنٍ هُمْ أَشَدُّ مِنْهُمْ بَطْشًا

#### 8. Dalil-dalil akhirat.

Kepada pemimpin-pemimpin Quraisy yang tidak percaya akan ada hari kiamat dikatakan seperti di musim bunga tumbuh-tumbuhan keluar dengan subur menghiijau, begitulah Allah pada hari kiamat nanti akan mengeluarkan manusia dari kubur-kubur mereka. Setelah mendengar satu bunyi yang kuat, akan berlakulah kiamat dan setelah itu pula akan berlaku kebangkitan. Kepada Allah, semua itu mudah saja.

(a) (Ayat: 11).

وَأَخْيَيْنَا بِهِ بَلَدَهُ مَيِّتًا كَذَلِكَ الْخُرُوجُ ۝

(b) (Ayat: 42).

يَوْمَ يَسْمَعُونَ الصَّيْحَةَ بِالْحَقِّ ۚ ذَلِكَ يَوْمُ الْخُرُوجِ ۝

(c) (Ayat: 44).

يَوْمَ نَشَقُّ الْأَرْضَ عَنْهُمْ سِرَاعًا ۚ ذَٰلِكَ حَشْرٌ عَلَيْنَا يَسِيرٌ ۝

#### 9. Di dalam surah ini, sifat ilmu Allah diperjelaskan dengan berbagai cara.

(a) Allah mengetahui setiap bahagian badan manusia yang telah mati walaupun setelah ia hancur lebur (Ayat: 4).

قَدْ عَلِمْنَا مَا تَنْقُصُ الْأَرْضُ مِنْهُمْ

(b) Oleh kerana Allah adalah pencipta manusia dan hati-hati mereka, Dia juga mengetahui segala lintasan hati dan bisikan hati, dari segi ilmuNya Allah lebih hampir kepada manusia daripada urat lehernya. Untuk manusia menyampaikan doanya, Allah tidak memerlukan orang tengah (Ayat: 16).

وَلَقَدْ خَلَقْنَا الْإِنْسَانَ وَنَعْلَمُ مَا تُوَسْوِسُ بِهِ نَفْسُهُ ۚ وَنَحْنُ أَقْرَبُ إِلَيْهِ مِنْ حَبْلِ الْوَرِيدِ ۝



(c) Rasulullah s.a.w. dihiburkan bahawa segala gangguan dan perbuatan menyakiti Baginda yang dilakukan oleh orang-orang kafir itu semuanya diketahui oleh Allah (Ayat: 45).

نَحْنُ أَعْلَمُ بِمَا يَقُولُونَ وَمَا أَنْتَ عَلَيْهِمْ بِجَبَّارٍ